

HARANGUE DE L'AMATEUR DE JUSTICE, AUX TROIS ESTATS



DE L'AMATEUR
DE JUSTICE

PAR TROIS PARTIES



W. D. C. XV

H A R A N G V E

De l'Amateur de Justice,

AUX TROIS ESTATS.

C'Est de vous (Messieurs) que nous esperons
que la Justice sera remise en la possession
de son ancien patrimoine, d'ou elle a esté hon-
teusement bannie par ceux de nostre Siecle: c'est
de vous que nous attendons le Restablissement
de son ancienne Noblesse enfermée dās les cof-
fres de l'ignorance, liée & garotée d'une chesne
à la Persienne souuenés vous que c'est elle qui a
fait autresfois florir toutes ces belles Republic-
ques payenes, dont vous auez tiré vos loix, celle
de Rome, d'Athene, & de Lacedemone ne se
sont elles pas perdues en la perdant: prenez gar-
de qu'il n'y en aye autāt à la vostre, car elle com-
mande a se laisser d'endurer, si vous ne donés or-
dre qu'elle ne soit remise en sa premiere splen-
deur. Pleust à Dieu que ceux qui sont pourueus
de ses offices, sceussent bien pratiquer ces belles
leçons que Dieu leur a dictées par la bouche de
ses Prophetes & Apostres. Iuges voyés ce que
vous faictes, car ce n'est point le Iugement des
hommes que vous exercés, mais celuy de vostre
Dieu & selon que vous iugerez ainsi serés vous
iugés; & derechef, faictes Iugement & Justice,
ou autrement j'ay iuré en moy que vostre mai-
son sera deserte. Elles leur seroient fort faciles a
mettre en vsage, s'ils auoient tant soit peu d'ex-
perience aux affaires, & suiuioyent les loix: c'est a

e si la loy dominoit, non pas eux la loy. Et la
 verité nous dirons, que la Republicque laquelle
 est la mieux ordonnée & policée, est celle en la-
 quelle domine non tous indifferemment ou plu-
 sieurs, ains celle en laquelle la loy seule domine:
 car elle n'est iamais poussee d'aucune affection,
 elle ne se courouce point, elle ne hait personne,
 elle n'est point saisie d'ambition, elle aime tout
 également & les fauorise, & tādīs qu'elle domi-
 ne, elle n'édure point qu'aucun s'élève par am-
 bition, pour conduire le peuple a son plaisir, mais
 elle gouuerne sagement la Republicque: c'est
 pourquoy le Iureconsulte Pomponius, l'appelle
 vne promesse & obligation commune de la Ré-
 publicque; & Aristote qu'elle est le commun con-
 sentement du peuple, lequel ordonne par ses loix
 comme chascune chose se doit faire ou non faire:
 ainsi aussi Ciceron, qu'elle ordonne ce qui est
 iuste & bon, & deffend ce qui est mauuais: & a
 quoy s'accorde ce que dit le Iureconsulte Mode-
 stinus, que la force & vigueur de la loy est com-
 mander, deffendre, punir, & permettre. Et certes
 les Magistrats qui l'ont violée & violent encōres
 tous les iours, doibuent bien penser que l'œil de
 la vengeance ne dormira pas tousiours. Ceux qui
 ont droit de Iustice, comme plusieurs Seigneurs
 debüroient bien connoistre, ceux lesquels ils co-
 mettent pour l'exercer: car de la vient vn grand
 bien a leurs subjects ou vn tres-grand mal: ainsi
 donc (Seigneurs) lors que les offices des Iuges
 vacqueront en vos iustices, donnés les places de
 iudicature a gens qui en soient capables & di-
 gnes, vous serez les premiers qui en receurez les

fruits, & vos subiects les seconds. Dauantage vous ferez voir a nos Roys la faute qu'ils font de vendre les Estats, voire des premiers de leur Iustice, & non seulement des Iuges & Iurisdiccions Royales, & des Iuges Presidiaux, mais des Parlemens. Le Roy Louis douzieme en fit le premier l'ouuerture pour les Estats de la chambre des Comptes le Roy François apres l'a suui, pour tous les Estats de iudicature, mesme des Parlemens: celuy a qui nous nous ressentons tant redebua- bles d'auoir fauorisé les lettres en France. Et le Roy Henry le Grand, duquel les loüanges sont & seront a lamais espanluës iusques aux der- niers confins du monde. La persuasion d'aucuns qui luy presenterent les grands deniers qui luy en viendroient les a rendus fiefs, faisant finan- cer par an aux Officiers le sixiesme de leur Estat. Miserables qui tiennent des charges a ceste condi- tion, qui acceptent le temps qu'ils consomment a seruir d'une somme qu'il faut qu'ils gagnent pour la payer, & si par ce moyen en rendant les estats fiefs, c'est ôster aux gens d'honneur le mo- yen de pouuoir seruir leur pays, & ouurir la porte aux ignorans, c'est a dire a ceux qui auront plus d'argent que de science. Helas ou est ce grand President la Vacquerie, pour nous en faire des Remonstrances, n'en naist il point vn Phenix de ces cendres pour nous entonner icy les dis- cours, & nous apprendre que ce n'est point l'or & l'argent qui maintiennent les Roys & leurs Estats: mais ces deux colonnes, la pieté & la Ius- tice. Heureux ceux qui ont tellement gouverné leurs Provinces qu'ils n'ont laissé apres eux au-

conueltige d'auarice & luxure. Rochers inacces-
 sibles, forteresses imprenables & inexpugnables
 & bouleuers de iustice, quand aurons nous l'heur
 que nostre Roy vous appellera par vos capacitez,
 suffisances, bonnes moeurs, & grande experience
 aux affaires : afin d'amacer toutes sortes de mo-
 yens fort propres a tirer la verite du milieu des
 tenebres, dircerner le iuste de l'iniuste, garantir
 les vesues & les Orphelins de la foule & oppres-
 sion des profanes & impies. Les reformatiōs cō-
 mēcēt quelquefois par les parties les plus basses,
 doncques (Seigneurs) a qu'il le Roy a concedé les
 Iustices ne cerchēs li officiers du Roy dans les
 Iurisdiction, qui remplissent leurs sieges des ap-
 pellations des sentences qu'il auront eux me-
 mes donnees, pour se faire recepuoir plusieurs
 fois aux parties & y consistēt en diuers temps
 ny admettēs point aussi des Procureurs des Sie-
 ges car ils n'auront quē l'habit des Iuges, qui est
 la robe qu'ils y porteront aux iours qu'ils iront
 exercer leurs charges, & peut estre qu'encōres il
 auront apprehension, d'enveloper leur ignoran-
 ce d'une loutaie & d'une robe: croyēs moy ces
 tous vautours enrobēs, monstres difformes, hor-
 ribles & exerables, ayant bien au dehors la figu-
 re d'hommes, mais en effect & au dedās, ce sont
 de vrais oreaux, des loups affamēs, des bestes
 farouches & sauuages, qui se repaissent incessant-
 ment de chair humaine, escorchent le pauvre
 peuple, le succent iusques aux entrailles, foulent
 le iuste & l'innocent, tantost par faux contracti,
 tantost par mutilations des registres, tantost par
 concussions & exactions tres pernicieuses nous

voyons praticaner cela tous les iours a nostre
 grand regret, qui me meut de représenter icy les
 qualitez d'un bon iuge, pour le choix que vous
 en ferez quand l'occasion s'en presentera aucun.
 ont depeint la Iustice couuerte d'un grand voile,
 & sans yeux, en quoy il me semble qu'ils luy font
 iniure: car sur toutes choses celuy qui est iuge,
 doit auoir les yeux clairs voyans, fermes & as-
 surez a la terreur des meschans: mais peut estre
 qu'ils ont voulu dire, que le Iuge ne doit se sou-
 cier des menaces, ny des prieres des grâds de ses
 parens, ny de ses amis, & qu'il doit destourner
 d'eux les lumieres chastes de la Iustice, de crainte
 que ses yeux ne soyent esloüis & ne conuiert, par
 ce qu'il doit faire iugement du bien d'avec le
 mal, & des innocens d'avec les coupables, qu'il
 ne se laisse point corrompre, par les esperances,
 faueurs, profits & telles autres especes de char-
 mes plus dangereux que ceux des magiciens, que
 leurs yeux ne soyent point surpris, constans &
 asseurez comme ceux de Socrate, quand sans fil-
 ler il regardoit le soleil, c'est a dire, Dieu du chef,
 duquel la Iustice est nee, le gouuernail & cõdui-
 cte de laquelle il a commis au Iuge, ainsi qu'a
 Euee son vaisseau a Palinurus, qui pour si peu
 qu'il se d'escouure de l'equité, tombera precipité
 entre les Syrtes & les rochers ses yeux aussi peu
 desirans que ses mains continantes ainsi que il
 soit Pericles, habillé modestement d'habits de
 gens a sa charge, incorruptible, au eugle aux pre-
 sens, qu'il soit tellemēt egal enuers vn chascun,
 qu'il puisse iuger sans passion, & que la raison
 soit comme en la main le baston a l'auugle, du-

quel il tatonne s'il ny a point de pierre en son chemin contre laquelle il offence & blesse son pied: que selon Solon il aye les oreilles fort ouuertes, a celle fin de s'acoustumer a ouir bien ou mal dire de luy, & ne fust esmeu des loüanges ou des medifances du vulgaire, & mesme quelquefois a la façon d'Ullisse, il se boucha les oreilles de cire, & quelquefois d'estre sourd, mais non lors qu'il exerce sa charge bref estre tel que Persele d'elpeint en ces vers.

*Ille sciat instum, gemina suspendere lance
Ancipitis libra, rectum discernat, ubi inter
Curua subit, vel cum fallit pede regula varo
Sitque potis nigrum vultu prefigere Theta.*

Au surplus, nous donnons aussi l'aduis de Ciceron en son Oraison *pro Cluentio*, *ne letum nimis etiã esse debere, ne letum faciat immortalitẽ, neque frigidum nimis in delictis plerendis purgandaque scelestis hominib' ciuitate*: mais no^o voulõs que le Iuge viue avec vne ame innocẽte, qu'il n'apprehende point la peine, qu'il ne soit point paresseux, ny qu'il se laisse trop aller, qu'il ne se face aussi trop redouter, qu'il ne soit audacieux, mais bien temperẽ, qu'il ne soit trop precipitant, ne aussi trop estourdi, qu'il ne se laisse emporter a la collere, ny trop grande compassion, qu'il ne se laisse fleschir, qu'il soit tousiours ferme, qu'il ne se laisse suborner: bref qu'il soit aussi homme de biẽ & aussi sage que celui lequel a peine Apollo peut il trouuer entre mil. Quand nous le voudrons choisir il ne faut point que nous ayons autrement esgard a sa parentẽ a son estre & creatiõ: mais seulement que nous regardions s'il a esté
nourri

nourri & allaité du lait des mammelles de Justice, laissant les moyens qui ne sont que choses terrestres, caducs & perissables. Imitons ces anciens payens, lesquels estoient tous zelateurs de Justice, ne la laissant point à l'abandon de qui la vouloit, ne l'exposoient point à l'ancien, comme nous semblons faire aujourdhuy à toute sorte de personnes, ainsi qu'une marchandise, dont on ne fait pas grand compte. Alexandre Seuerus Syrien de nation, bon Prince, guerrier, iusticier, pieux, & le premier Empereur Christicolle après Adrian n'a iamais permis, ne voulu souffrir que les Estats de Indicature se missent en vente, *neceffe est, inquit, ut qui emit vendat: ego non pati ar mercatores potestatum, quos si pati ar damnare non possim: Erubescio enim punire illum hominem qui emit et vendit.* Voila de belles parolles dignes certes d'un tel Prince, lesquelles peuuent servir d'exemple a nos Roys, qui maintenant ne sçauoient aujourdhuy punir iustement ceux qui ont charge sur un peuple, s'ils commettent quelque iniustice, par ce que l'on peut dire que ce sont eux mesmes, qui leur en donnent le subject, metrans en vente leurs Estats de iudicature, les destournans aux plus chers & derniers enche-risseurs, qui le plus souuent sont enfans de Marchans, qui n'auront iamais esté nourris en l'Eschole de vertu, & lesquels osent bien mettre tout leur auoir, ou bien peu s'en faudra en des Estats, pour exercer toute leur vie contre leurs consciences tortes fortes d'impietés, ne proposans, ne liberté, ne vertu pour leur but: ains seulement une conuoitise de cheuances, auoir, & richesses, laquelle n'a borne ne mesure quelconque, ne aucun assouuissement, non plus qu'un feu bien embrazé, ou un creux abis-

de mer, l'un & l'autre insatiables de tout ce qui se peut mettre dedans, Mais le pis que je voy, c'est que la pluspart d'eux, sont ordinairement alliés les uns avec les autres, de sorte que si quelqu'un d'eux a delinqué, il est impossible d'en esperer la punition, & moins encores d'auoir Iustice, si on a quelque chose a desmesler avec eux, & si on en veut reculer un, il faut par mesme moyen recuser tout le siege, cōme nous voyons cela arriuer souvent. Es Estats du pais de Languedoc tenus a Montpellier, en l'au mil D. lvi. il fut arresté de remonstrer au Roy, qu'il luy plüst ordonner, que les proches parents & allies ne fussent admis en mesme siege ny en mesme court: Et quatre ans apres, les mesmes remonstrances furent faictes au Roy, par les Estats de France tenus a Orleans, mais il est impossible d'y remedier maintenant, tant que les Estats soient perpetuels, & conserués par la Paulette. Il y a deux cents cinquante ans & plus que le Roy Charles cinquieme, & auparauant luy Philippe le Bel, auoient ordonné que nul ne fust Iuge au pays de sa naissance, conformement a l'Edict de Marc Aurele, lequel ordonna que nul ne fust Gouverneur de son pays, ce qui fut depuis estendu aux conseillers assesseurs & Gouverneurs des Prouinces, & fut tres-bien executé: comme il est encores en Espagne, & en la pluspart des villes d'Italie, le iuge ordinaire est estrangier. Il y a quelque temps qu'aux Estats de Poulougue, les Ambassadeurs de Moscouie requierent la mesme chose: mais l'ordonnance de nos Roys a esté tost enseuelie. Et sans chercher les Edicts des Empereurs Romains, ne lisons nous pas dans les memoires de Cesar, que les ancies Gaulois, & mesmes ceux d'Autun auoient vne loy inuiolable, qui

deffendoit que les Magistrats fussent continués plus d'un an & que deux d'une famille ne peussent estre Magistrats, ny Senateurs ensemble, ny l'un tant que l'autre qui l'auroit esté viuroit. Davantage la chose qui plus doit estre recommandée a tous subiects en general, & a chacun en particulier, est la conservation du bien public. Et quel soing, quel soücy du bien public, peuvent avoir ceux qui ny peuvent avoir aucune part? comment auront ils soing de ce qui ne leur touche ny pres ny loin? Et si quelque homme de bien veut dire, faire & entreprendre quelque chose pour l'utilité publique, estant privé qui l'escouterà? qui le supportera? qui le favorisera? les histoires nous apprennent, que presque tous les Estats populaires ont esté changés en Monarchies, pour avoir donné les charges & commissions plus long temps qu'il n'estoit bon soing: comme a Pisistratée en Athenes, a Phidon en la ville d'Argos, a Cypselée en Chormire, a Derys en Syracuse: a Pancee en Leonce, a Phalaris en Ionie: & sans aller si loin d'où sont venus tous les Prince & Seigneurs d'Italie, sinon que de là. ainsi que ces iours passés nous l'avons faict voir en certaines remonstrances. Ce que prevoiant le dictateur Aemilius Mamercus presenta requeste au peuple, qui passa en force de loy par laquelle il fut ordonné que la censure des lors en avant prendroit fin en dix-huict mois, qui estoit establie pour durer cinq années, & le iour suivant il deposa la dictature ne la voulant continuer plus d'un iour, & adiousta ceste raison, *ut Sciasis quam michi diuturna imperia non placeant*. Et a peu de temps de là, nous lisons que le tribun Gabinus fut tué en plein Senat par les Senateurs mesmes (comme nous lisons en Dion) pour avoir

faict decerner a Pompée la commissiō de la guerre
 Piraticque pour cinq ans ; & rend la raison pour-
 quoy il est fort dangereux d'octroyer les charges
 honorables trop long temps, par ce (dit il) que le
 naturel de l'homme est tel, qu'il ne prise vn cha-
 cun, & ne peut viure en subiect, depuis qu'il a long
 temps commandé: c'est ce que dit Cassiodore quasi
 en mēme sens, *antiquitas voluit prouinciarum di-
 gnitatem annua successione reparari, ut nec diutina
 potestate vnus insolesceret. et multarum propectus gau-
 dia reperirent*. Et peut estre que ce fut l'vn des plus
 grands moyens de conseruer l'Estat de Assyriens &
 Persans, qui tous les ans changeoient de Capitaines
 & Lieutenans. Et cependant aujour d'huynous voi-
 yons que les enfans par le nouen du droict annuel,
 sont maintenus & gardés en la possession de Estats
 de leurs peres, quelle folie ie vous prie le pere peut
 estre sera meschant & scauant, & le fils ignorant se-
 ra en sa place, de sorte que tous les iours nous rōbons
 de hebre en chaud mal, de dire qu'il ne sera receu
 s'il est ignorant, c'est s'abuser: yeu qu'autant en
 pend a l'œil de ceux qui le recoient ayant peut
 estre des enfans de telle Cathégorie, qu'ils veulent
 pouruoir semblablement auant ou apres leur mort,
 O que les republicques sont heureuses quand el-
 les sont gouuernées par gens de bien, prudens, &
 scauans: car ou la sapience est, la iustice ne s'en peut
 pas esloigner, & ainsi il ne s'y peut rien faire d'in-
 iuste, ny de Tirannie^{ue}; mais ou l'ignorance est, & le
 deffaut d'experience: ce ne sont qu'arrogances, au-
 daces, prauicques de toutes choses contre tout droict
 & raison (ce qui estoit reproché aux Atheniens vn
 ardent desir & appetit insatiable de gain) tout y est
 en desordre, d'autant que si le Iuge ignorant aime

aujour d'huy quelqu'un il le favorisera mais si le len-
 demain il le luy a fait la moindre offense, il le con-
 dânera, & n'ya aucun qui ne puisse faire de telles fau-
 tes, s'il est ignorant des loix & des sciences, & qu'il ayt
 ceste opinion d'estre la loy mesme de cela qu'il a
 puissance de iuger. Certes le gouuernement de tels
 Iuges & Magistrats est tres-dangereux, par ce que ils
 foulent les plus nobles & mesprisent les vertueux
 & scauans, les vns estants poulés d'amour, de hai-
 nes, d'animosités, ou de quelques affections particu-
 lieres, les autres d'esperance, de crainte, d'ambition,
 ou d'auarice iugent le plus souuent ce qui est ini-
 que, & ainsi ils ne fement toute leur vie (comme dit
 le sage) que peruerfite, mais aussi ils doibuent sca-
 uoir qu'ils en moissonneront le tourment, & que
 la verge de leur indignation prendra fin. Vous au-
 rés donc Messieurs) assés d'affaires aux Estats, si
 vous voulés apporter vne reformation a la Iustice,
 que de parler de tels officiers, telle corde merite bien
 d'estre touchée & a besoin d'estre mise en bon ton,
 Vous trouuerez assés en France a qui commettre le
 maniemement des affaires, nous auons encores Dieu
 merci bon nombre de personages doctes & ver-
 tueux, nos Prouinces, nos villes, vous en fourniront
 assés, Estant chose certaine & sans doubte, que de
 gens de bien & entiers il ne scauroit sortir, ny ef-
 clorre autre chose que de bons cōseils & aduis. Nous
 trouuerrons si nous voulons des Fabrices, des Pu-
 blicoles, des Curies, des Calarins, des Cecinnates,
 des Attilles, pour les faire asseoir sur le trosne de la
 Iustice, & lesquels prefereront tousiours leur par-
 ticulier au public. Helas bon Dieu! ne scaurions
 nous voir vne telle reformation en nostre pauvre
 Frâce, n'aurons nous iamais cet heur que de voir les

Estats non plus venaux. C'est de vous (Messieurs)
 que despendent telles affaires pour le bien de l'E-
 stat, C'est a vous de remonstrer au Roy les maux
 que nous endurōs tous les iours de ce costé la. Vous
 voyez comment ceux d'aujour d'huy a cause de la
 charté de leurs offices, vendent la iustice, vendent
 les Republiques; védēt le sang du pauvre peuple,
 vendent les loix aussi, & conséquēment ostent les
 loyers d'honneur, de vertu, sçauoir, pieté & de Re-
 ligion, oudrānt en plein iour la porte aux larcins,
 aux concussions, à l'auarice, Iniustice, ignorance &
 l'impieté & a tous vices & ordures. Voila en vn
 mot que c'est que de la pluspart de nos iuges, & de
 quels Horace a tres-biē sceu dire. *Male verum exa-*
minant omnes corrupti iudices, ie dicts la plus part,
 car ie ne doute point qu'il ny en ait encōres d'en-
 tre eux, qui regrettent de voir telles choses; mais
 quoy: que peut faire vn petit nombre, entre tant
 de corrompus, sinon que d'auoir recours a Dieu,
 & le prier d'auoir pitié de son peuple desolé, affli-
 gé, foulé, & ruiné par ceux qui ont l'autorité
 sur luy. ou bien auctorisent ceux qui commettent
 telles impietez, sans se soucier du iuste, sans sup-
 porter la veufue, l'orphelin, sans reprimer l'insolen-
 ce des vns & des autres, sans guerdonner la vertu
 & integrité de ceux qui le meritēt. Ce sont a propre-
 ment parler torrens de nature desbordée & acces-
 siue lesquels apres auoir rompu la leuée d'equité
 & de bonté, viennent à s'espandre parmy les cam-
 pagnes, rauager pour vn temps les semences de
 iustice, atterrer les moissons toutes entieres, iusques
 à ce que finalement ils se vont perdre & precipiter
 dās cet abisme espouuētable duquel parle Virgile.

tenent media omnia Silva

Cocitus-que Sinus Labens circumfluit atro.

Par faute de voir bien à l'œil ceste iustice diuine, laquelle avec des yeux en plus grand nōbre qu'Argus, penetre au dedans de leurs pensées profanes, & à la mienne volonté que ces gēs la se voulussent vn peu arrester à cōsiderer, qu'elle a esté ceste iustice si curieusement obseruée par le paganisme, ils ny trouueroient que toute équité & droiture, nous en auons encores leurs loix, lesquelles sont plus diuines qu'humaines. D'auantage, s'ils vouloient s'enquerir ou est ce grand Alexandre ce grand Cesar, ce grand Charlemagne & tant d'autres Roys, ils seront estonnés de se souuenir quels ont esté leurs Estats, ce Lyrique payen a bien chanté leur honneur.

Nullus argento color est avaris

Abdite terris inimica Lamna

Crispe salusti nisi temperato

Splendeat usu.

Qui consistoit principalement en effects charitables, l'vn desquels & le principal estoit d'auoir l'affection vers les pauures, les soustenir, & par au-mosnes releuer leurs necessités; ainsi en doibuent vser ceux qui ont auctorité sur vn peuple, escouter la plainte d'vn pauvre plustost que celle d'vn riche, c'est à dire le preferer sans tant le faire demeurer à leur porte, non tant sous esperance de gaing que pour l'amour de la vertu: imitans en cela Traian ce grād Empereur Iusticier, lequel est à bō droit loué des historiens, de ce qu'estant à cheual pour aller à la guerre, il mit pied à terre pour ouïr la plainte que luy vouloit faire vne pauvre femme. Bel exēple certes pour ceux qui se meslent de gouver-

ner la iustice, lesquels s'ils veulent faire le semblable, cest a dire s'ils sont amateurs d'equite & zelateurs de iustice, ils doiuent auoir esperance certaine de ne mourir iamais que pour viure dans le Ciel. Pour conclusion suiuous tousiours la iustice, reestablissons-la comme elle estoit du temps de nos anciens pees, embrassons la, sans en iamais quitter la prise, a l'exemple de ces grands personages Payens, lesquels bien qu'ils n'eussent le vraye conoissance de nostre Dieu: toutesfois il s'est seruy d'eux, pour faire admirer sa bonte & iustice, par des gens bien versés, & qui ont laissé apres eux vne memoire eternelle de leurs actes vertueux a tout le genre humain faisons eslection de gens suffisans & capables, soit en exemple de bonne vie pour l'administrer: n'allons point chercher ceux qui n'ont que la bourse en la main & rien autre chose pour leur donner des charges, afin de se faire bonneter, craindre sans raison, & exercer toutes sortes d'impietés mais ceux-la tant seulement *Quorum Spectata et nobilitata virtus non solum natura coroborata, sed etiam disciplina putabatur*, & lors ce sera la vraye guerison del'Estat, ny ayant rien plus necessaire en ce monde, que de bons officiers doiés de science & sagesse, afin de bien conduire & ordonner la vie humaine a sa propre & heureuse fin, & lesquels seront curieux de rapporter tout leur soin & industrie, pour la conduicte d'icelle, au bien & vrillicé publicque, afin d'en remporter aussi pour eux mesmes, vne loüange, gloire. & reputation immortelle.